

Forto nije poklekao pred prijetnjama i ucjenama sindikalaca



Prvi put jedan kantonalni premijer nije poklekao pred nerealnim zahtjevima i ultimatumima. Edin Forto je svojim ponašanjem poslao jasnu poruku da budžetskim novcem ne želi i neće kupovati glasove birača.

Vjerovatno vam je poznato da su zdravstveni radnici u Sarajevu već neko vrijeme u štrajku. Na prvi pogled, ništa neobično, rekli bi, gotovo cijela Bosna i Hercegovina je u štrajku, pa šta ako su i tamo neki zdravstveni radnici.

Međutim, jedan od tih zdravstvenih radnika koji su u štrajku i koji želi da ostane anoniman, me jutros kontaktirao na FB i zamolio da objavim njegov tekst povodom ovog štrajka kako bi građani imali pravi uvid u ovaj štrajk i upoznali se ovom novonastalom situacijom.

Tim povodom prenosimo njegov tekst:

Uz poruke „Dosta ušteda, tražimo ulaganja“ i „Tražimo dostojanstvene plate“, na protestima zdravstvenih radnika u Kantonu Sarajevo održanim nedavno ispred zgrade Vlade, iz mase su se mogli čuti i povici „Nema glasova“.

Direktor JU Dom zdravlja Sarajevo Mehmed Kulić nije podržao ove proteste, i pola sata prije okupljanja radnika, uputio je dopis kojim je upozorio da niko ne smije napuštati svoje radno mjesto, te da je ukoliko to urade riječ o teškoj povredi radne discipline.

Više nego očigledno je da su i sami zdravstveni radnici i radnici uposleni u zdravstvu, podijeljeni međusobno vezano za zahtjeve kojima se traži povećanje koeficijenta, odnosno trenutnih plaća, i da nema jedinstva, što dovoljno govori o ispolitiziranosti ovih protesta.

Premijer Kantona Sarajevo Edin Forto ponudio je da sjednu za pregovarački sto i pokušaju naći kompromisno rješenje. Međutim štrajkači su to odbili, iz čega je i neupućenima u trenutna zbivanja posve jasno da njima nije stalo ni do povećanja plaća a ni do pacijenata, već isključivo do izvršavanja zadaća koje

su dobili od određenih političkih krugova.

Pokušavaju izvršiti pritisak ultimativnim i prijetećim porukama da Forto i aktuelna vlast u Kantonu Sarajevo neće više dobiti glasove na izborima, ukoliko im plaće ne budu povećane po njihovim željama, a ne u skladu sa realnim stanjem kako u Budžetu Kantona, tako i u zdravstvenom sektoru.

Prvi put jedan kantonalni premijer nije poklekao pred nerealnim zahtjevima i ultimatumima. Edin Forto je svojim ponašanjem poslao jasnu poruku da budžetskim novcem ne želi i neće kupovati glasove birača. Fortu ne zanima takva vrsta trgovine.

Ono što želi, a jasno je to i poručio u svojim medijskim istupima, jesu bolje zdravstvene usluge za pacijente. Povećanja plaća, koja su gotovo svake godine dobijali pritiscima na vlast, a koja je strahovala da će ako im ne udovolji ostati bez glasova na izborima, nisu pratila poboljšanje kvalitete zdravstvenih usluga za građane.

Forto je pokazao čvrstinu, i svojim odnosom i argumentima u brojakama, dao do znanja da su zahtjevi „šačice nezadovoljnika“ i politički instruiranih štrajkača nerealni, te da neće pokleknuti pod njihovim prijetnjama i ucjenama. Od glasova na izborima važniji su mu građani i zdravstvene usluge koje (ne)dobijaju. (vijesti,tl)

Date: 15-10-2019